

四庫全書

集部

欽定四庫全書

集部

染谿集卷一百七十六

四至六

詳校官庶吉士臣張溥

侍讀臣孫球覆勘

總校官知縣臣楊懋珩

校對官中書臣潘奕雋

謄錄監生臣汪元亮

欽定四庫全書

梁谿集卷一百七十四

宋 李綱 撰

建炎進退志總叙上

靖康元年秋金罷知樞密院事河北河東路宣撫使除  
觀文殿學士知揚州以言者落職提舉杭州洞霄宮責  
授保靜軍節度副使建昌軍安置尋移雲安二年春行  
次長沙蒙恩復舊官除資政殿大學士領開封府事時  
金人再犯闕都城圍閑道路阻絕久之聞命即率湖南

勤王之師入援王室以四月初啓行自巴陵乘舟泛江  
五月初次繁昌傅元帥府檄方審都城破二聖播遷號  
慟幾絕次太平州覩今上登寶位赦書改元建炎悲喜  
交集是時金陵為叛卒周德等所據囚帥臣宇文粹中  
殺官吏居民焚舟船不可勝數劫掠官府士民財物為  
之一空雖受發運判官方孟卿招安而擐甲乘城殺戮  
恣橫如故余遣使臣齋文檄諭之令聽稟節制勤王乃  
肯釋甲然猶桀驁不以時登舟擅驅不當行士卒欲乘

間遜去次金陵因與轉運判官權安撫使李彌遜謀盡  
誅其首惡四十六人而以其徒千餘人令提舉常平官  
王枋統之以行因奉表詣行在賀登極且辭領開封府  
事之命上書論時事并具奏金陵東南形勝之地新罹  
兵火宜早擇帥以鎮撫之次寶應聞已降麻告廷除正  
議大夫尚書右僕射兼中書侍郎隴西郡開國侯加食  
邑實封荷上特達之知感極而繼之以泣次泗上以汴  
流淺涸捨舟陸行是時四方勤王之師皆已放散因留

湖南金陵兵卒於泗奏取指揮獨取數百人防護以往  
次虹縣始被受尚書省劄子有旨趣召蓋行在前此不  
知余由江淮以來遣使齎賜御書并降詔皆自湖北往  
至是得金陵奏乃劄報新除有召旨也因奉表劄以辭  
恩命次會亭上遣中使王嗣昌傳宣撫問賜茶藥各一  
銀合奉表以謝次穀熟御史中丞顏岐遣人投文字封  
以御史臺印開視之乃論余不當為相章疏其大意謂  
張邦昌為金人所喜雖以為三公真王宜更加同平章

事增重其禮余為金人所惡雖已命相宜及其未到罷之以為中太一官使兼講筵官置之閒地前後凡五章皆不降出故岐封以示余欲余之留外而不進也乃知命相蓋出於淵衷獨斷而外廷所以沮之者無所不至益以感懼或勸余不若遂留余曰國家艱危至此極矣豈臣子事形跡避嫌疑自愛惜之時哉上知遇如此得一望清光敷陳腹心退就田里死且不朽如岐言何足恤會復遣使趣召遂行有旨賜御筵於金果園命中書

侍郎黃潛善押燕尚書右丞呂好問同知樞密院事汪伯彥同與即具奏辭免次金果園龍圖閣學士兼侍讀董耘來見傳上旨嘗遣從事郎劉默齋御書由湖北往迓卿書中有學窮天人忠貫金石方今生民之命急於倒掛諒非不世之才何以協濟事功之語感激流涕遂如行在遇三執政南都門外告以已具辭免御筵乃歸館所時以城北鈴轄司為府第少頃上遣使趣見進對于內殿見上敘致不覺涕泗之橫流上亦感動因奏曰

金人不道專以詐謀取勝中國而朝廷不悟一切墮其  
計中旣登城矣猶假和議已定之說以欵四方勤王之  
師凡都城子女玉帛乘輿服御歷代所傳寶器下至百  
工技藝無不畢取然後劫遷二聖東宮后妃嬪御親王  
宗室凡係於屬籍者悉驅以行遣姦臣傳命廢滅趙氏  
而立張邦昌僞號大楚在京侍從百官北面屈膝奉賊  
稱臣莫有死節者自古夷狄之禍中國未有若此之甚  
賴天祐我宋大命未改故使陛下總師于外為天下臣

民之所推戴系墜緒繼絕統此非人力乃天授也興衰  
撥亂持危扶顛內修政事外攘夷狄以撫萬邦以還二  
聖皆責在陛下與宰相宜得有大過人之才智者相與  
圖治以成中興而考論之際首及微臣自視缺然力小  
任重恐不足以仰副陛下特達知遇之意伏望聖慈追  
寢成命改授其人實天下幸甚上曰朕知卿忠義智畧  
甚久在靖康時宣力為多特為同列所不容故使卿以  
非罪去國而國家有禍故如此朕嘗進言於淵聖欲使

夷狄畏服四方安寧非相卿不可今朕眇然以一身託  
於士民之上賴卿左右扶持以濟艱難此志已定卿其  
勿辭余頓首泣謝且道董耘所傳聖語荷知如此雖糜  
捐不足以報德然臣未到行在數十里間御史中丞顏  
岐封示論臣章疏謂臣為金人所惡不當為相如臣愚  
憲但知有趙氏不知有金人固宜為其所惡然岐之論  
臣謂材不足以任宰相則可謂為金人所惡不當為相  
則不可臣愚不知金人與趙氏為仇敵其所喜者為趙

氏耶其所惡者為趙氏耶且為趙氏之臣而金人喜之此必有以得其心者而反用以為相則自古賣國以與人者皆為忠臣矣今陛下用臣斷自淵衷而岐之論如此如臣迂疎自知不足以當重任但願一望清光乞身以歸田里至於陛下命相於金人所喜所惡之間更望聖慮有以審處於此上笑曰岐嘗有此言朕告之以如朕之立恐亦非金人之所喜者岐無辭而退此不足恤余奏曰陛下天縱睿聖固不難察此然臣材力綿薄實

不足以勝任因出劄子再拜力辭上慰諭久之遣御藥  
邵成章宣押赴都堂治事又命執政聚於都堂即上馬  
歸日已暮矣時六月朔日也翌日有旨立新班奏事對  
于內殿同執政奏事訖留身奏上曰自古人主惟論一  
相相得其人則朝廷正而天下之事舉相非其人則朝  
廷亂而天下之事廢方承平無事之時猶當考論其相  
而况艱難多事之際乎譬如負重致遠力祇足以勝百  
斤而使之荷千鈞之重則必顛踣於道路矣以今日國

勢觀之外則強敵陵侮二聖在其掌握中內則兵力單  
弱四方盜賊竊發殘破州縣者不可勝數朝廷之上僭  
偽之臣方且襯崇信任與聞國政州縣之間官吏廢弛  
顧望進退視朝廷號令如罔聞知當此之時雖聖賢馳  
騖有所不足而欲以臣之迂疎獨任其責雖三尺之童  
有以知其難也易稱鼎折足覆公餗而孔子以謂知小  
而謀大力小而任重言不勝其任也伏望聖慈博選天  
下之有材智者為相仰佐陛下共濟艱難而臣憂患餘

生得以退藏於深渺不勝幸甚上曰卿素以忠義自許  
豈可於國家艱危之時而自圖安閒朕決意用卿非在  
今日社稷生靈賴卿以安卿其無辭余感泣再拜曰臣  
愚陋無取不意陛下知臣之深也然今日之事特危扶  
顛以創業為法而圖中興之功在陛下而在臣昔管  
仲語齊桓公曰不能知人害霸也知而不能用害霸也  
用而不能任害霸也任而不能信害霸也能信而又使  
小人參之害霸也夫知人能信任之而參以小人猶足

以害霸況於為天下而欲建中興之業乎方靖康之初  
淵聖皇帝慨然有圖治之意而金人退師之後漸謂無  
事不能分別邪正進君子退小人而賢否混淆是非雜  
揉且和且戰初無定議至其晚節專用姦佞而黜忠良  
敵騎再來遂有宗社不守之禍如臣者徒以愚直好論  
事為衆人不容於朝使總兵于外而又不使之得節制  
諸將自度不足以任責乞身以退而又百端讒譖竄逐  
遠方必欲殺之而後已賴淵聖察臣孤忠特保全之卒

復召用然已無及矣不謂今日遭遇陛下龍飛初無左右先容之助徒採虛聲首加識擢付以宰柄顧臣區區何足以仰副圖任責成之意然靡不有初鮮克有終如臣孤立寡與更望聖慈察管仲害霸之言留神於君子小人之間使臣得以盡志畢慮圖報涓埃雖死無憾昔唐明皇欲相姚崇崇以十事邀說皆中一時之病類多施行後世美之臣常慕其為人今臣亦敢以十事仰干天聽陛下度其可行者願賜施行臣乃敢受命其未合

聖意者願賜折難臣得以盡其說上可之余因出劄子奏陳其一曰議國是大略謂中國之御夷狄能守而後可戰能戰而後可和而靖康之末皆失之今欲戰則不足欲和則不可莫若自治專以守為策俟吾政事修士氣振然後可議大舉其二曰議巡幸大略謂車駕不可不一到京師見宗廟以慰都人之心度未可居則為巡幸之計以天下形勢觀之長安為上襄陽次之建康又次之皆當詔有司預為之備其三曰議赦令大略謂祖

宗登極赦令皆有常式前日赦書一切以張邦昌僞赦為法如赦惡逆選人循資責降罪廢官盡復官職皆汎濫不可行謂當改正以法祖宗其四曰議僭逆大略謂張邦昌為國大臣不能臨難死節而挾金人之勢易姓建號身處宮禁南面以朝其後不得已乃始奉迎朝廷尊崇之為三公真王參與大政非是宜正典刑垂戒萬世其五曰議僞命大畧謂國家更大變故鮮伏節死義之士而奉賊旨受僞官屈膝於其廷者不可勝數昔肅

宗平賊而汙僞命者以六等定罪今宜倣之以勵士風其六曰議戰大略謂軍政久廢士氣怯惰宜一新紀律信賞必罰以作其氣其七曰議守大略謂賊情狡猾勢須復來宜於沿河江淮措置控禦以扼其衝其八曰議本政大略謂崇觀以來政出多門綱紀紊亂宜一歸之於中書則朝廷尊其九曰議久任大略謂靖康間進退大臣太速功效蔑著宜審擇而久任之以責成功其十曰議修德大略謂上初膺天命宜益修孝悌恭儉之德

以副四海之望而致中興每劄讀訖又敷陳其所以然上皆令留榻上俟詳觀有當施行者降出翌日降出議國是巡幸赦令戰守五劄餘皆留中次日與執政同奏事于內殿進呈議國是劄子上曰今日之策正當如此可付中書省遵守次進呈議巡幸劄子有旨令促留守司修治京城祇備車駕還闕欵謁宗廟詔永興軍襄陽府江寧府增葺城池量修宮室官府以備巡幸次進呈議赦令劄子僉謂藝祖登進曾赦惡逆今已行難追有

旨選人惟有職者循資謫降罪廢官令刑部具元犯申  
朝廷等第叙復次進呈議戰議守劄子有旨令討論修  
舉軍政措置控禦條件以聞奏事訖執政退余留身奏  
上曰臣愚瞽輒以管見十事冒瀆天聰已蒙施行五事  
如議本政久任修德三事無可施行自應留中所有議  
張邦昌僭逆及受偽命臣僚二事皆今日政刑之大者  
乞早降處分上曰執政中有與卿議論不同者更俟欵  
曲商量余奏曰邦昌僭逆之罪顯然明白無可疑者天

下皆謂邦昌處敵中歲餘厚結敵酋得其驩心故破都  
城遷二聖東宮盡取親王宗室以行邦昌蓋與其謀此  
固不可知然邦昌當道君朝在政府者幾十年淵聖即  
位首擢為相奉使敵中方國家禍難之時如能以守節  
推明天下所以戴宋之義以感動其心敵人未必不悔  
禍而存趙氏邦昌方自以為得計偃然當之正位號處  
宮禁者月有餘日敵騎既退四方勤王之師集邦昌擅  
降偽詔以止之又遣郎官分使趙野翁彥國等皆齋空

名告身數百道以行迨彥國等囚其使而勤王之師日進邦昌知天下之不與也不得已乃請元祐太后垂簾聽政而議奉迎邦昌僭逆始末如此而議者不同臣請備論而以春秋之法斷之若都城之人則謂因邦昌立而得生且免再取科金銀而德之若元帥府則謂邦昌不待征討遣使奉迎而恕之若天下則謂邦昌建號易姓其奉迎特出於不得已而憤嫉之都城德之元帥府恕之者私也天下憤嫉之者公也春秋之法人臣無將

將而必誅趙盾不討賊則書以弑君今邦昌已僭位號  
賊退而止勤王之師非特將與不討賊而已其罪為如  
何昔劉盆子以宗室當漢室中衰為赤眉所立其後以  
十萬衆降光武祇待以不死今邦昌以臣易君其罪大  
於盆子不得已以身自歸朝廷既不正其罪而又尊崇  
之以為三公真王參與國政此何理也議者又謂邦昌  
能全都城之人與宗廟宮室不為無功而陛下登極緣  
邦昌之奉迎無邦昌則陛下何以自明臣皆以為不然

譬之巨室之家偶遭寇盜主人之戚屬悉為驅擄而其僕欲奄家室奴婢而有之幸主人者有子自外歸迫於衆議不得已而歸所有乃欲遂以為功其可乎陛下之立乃天下臣民之所推戴邦昌何力之有臣於劄子中論之詳矣方國家艱危陛下欲建中興之業當先正朝廷而尊崇僭逆之臣以示四方其誰不解體又僞命臣僚一切置而不問何以勵天下士大夫之節執政中有議論不同者乞降旨宣召臣得與之廷辯如臣理屈豈

復敢言上許之乃令小黃門宣召黃潛善呂好問汪伯彥再對上語之故而潛善主之甚力大槩不出前所陳詰難數四乃屈服然猶持在遠不若在近之說余曰邦昌當正典刑何遠近之有借使在近當幽繫而反尊崇之如此何也潛善不能對上顧呂好問曰卿在城中知其詳謂當如何好問曰邦昌僭竊位號人所共知既已自歸惟陛下裁處又引德宗幸奉天不挾朱泚行後以為悔以附會潛善不若在近之說余曰呂好問之言首

鼠兩端且援朱泚以為例非是方德宗之狩奉天朱泚  
蓋未反也姜公輔以其得涇軍心恐資以為變請挾以  
行德宗不聽而其後果然今邦昌已僭逆豈可使之在  
朝廷使道路指目曰此亦一天子哉因泣拜曰臣不可  
與邦昌同列正當以笏擊之陛下必欲用邦昌第罷臣  
勿以為相無不可者上頗感動而汪伯彥亦曰李某氣  
直臣等不及上曰卿欲如何處置余曰邦昌之罪理當  
誅夷陛下以其嘗自歸貸其死而遠竄之受僞命者等

第謫降可也上曰俟降出卿劄子來日將上取旨余拜謝既退竊思若邦昌之事順逆曉然而猶費力如此其他豈可不憂是夕劄子果降出翌日同執政進呈潛善猶左右之乃以散官安置潭州次進呈議僞命劄子上曰國家顛覆士大夫不聞死節往往因以為利如王及之坐蕃衍宅門詬譽諸王余大均誘取宮嬪以為妾卿知之否余奏曰自崇觀以來朝廷不復敦尚名節故士大夫鮮廉寡恥不知君臣之義靖康之禍視兩宮播遷

如路人然罕有能伏節死義者在內惟李若水在外惟霍安國死節顯著餘未有聞願詔京畿諸路詢訪優加贈恤如王及之余大均朝廷見付御史臺推鞫必得其實臣聞方金人欲廢趙氏立張邦昌令吳秆莫儻傳道意旨往返數四京師人謂之捷疾鬼王時雍徐秉哲奉金人旨追捕宗室戚里令居民結保不得容隱以衣袂聯屬以往若囚繫然其後迫道君東宮后妃親王出郊皆臣子之所不忍言又受僞命皆為執政此四人者當

為罪首上以詢呂好問而好問以為有之得旨皆散官  
廣南遠惡州軍安置餘以次謫降內王及之余大均胡  
思陳冲等以贓濫繫御史臺候結案日取旨李若水贈  
官外霍安國贈延康殿學士有死節者令諸路詢訪以  
聞又進呈顏岐待罪章疏執政贊上欲令依舊供職有  
旨令除待制與宮觀執政退余留身上曰卿昨日內殿  
諍張邦昌事內侍輩皆泣涕卿今可以受命矣余拜謝  
曰自非陛下英睿天縱豈能決斷如此天下不勝幸甚

臣雖愚陋敢不黽勉自力以圖報稱因為上言今日國勢比之創業為尤難蓋創業之主乘興起之運積小成大猶或易為今日當國勢委靡不振之時夷狄盜賊憑陵擾攘之後士風偷惰人情畏怯府庫空虛郡縣殘破百度廢弛而欲奮厲整頓以成中興之功正猶大厦之傾持頽扶危須一一修葺而材料鮮少此所以為尤難也正賴陛下剛健不息以至誠惻怛之意加之不為羣議之所動搖先其大者急者而小者緩者徐圖之信任

而責成功臣乃得以竭盡愚慮以裨補萬一臣竊觀自古創業中興之主莫如漢之高祖光武唐之太宗皆有英明之姿寬誠之德仁厚而有容果斷而不惑故能決大事成大功戡定禍亂身致太平臣嘗取其行事大節編為一書便於觀覽欲繕寫進呈以備乙夜之觀應今日之變誠以數君為法中興之功亦不難致上可之因論高祖光武太宗數事合於今日者上皆以為然復奏上曰人主莫大於兼聽廣視使下情得以上通故舜明

欲上聞而士民之願效其智慮尤多陛下即大位已踰  
月而諫鼓院猶未置恐非所以通下情而急先務者上  
曰屢語執政猶未措置卿可便與施行余退因批旨置  
登聞鼓院於行在便門之外差官吏權攝又請置看詳  
官兩員於侍從職事官中選應士民上封事陳獻利害  
候降出並付看詳官簽擬可施行者將上取旨又於省  
門置司以受詞訴公狀至是已三具表劄辭免恩命皆

降批答不允仍斷來章乃詣閣門受告有旨兼充御營  
使以覃恩告廷轉正奉大夫加食邑實封時六月六日  
也

梁谿集卷一百七十四

欽定四庫全書

梁谿集卷一百七十五

宋 李綱 撰

建炎進退志總叙下

是日同執政對於內殿余奏上曰以今日國勢而視靖康間其不逮遠矣然而有可為者陛下英斷於上而羣臣輯睦於下庶幾革靖康之風而中興可圖然而今日之事須有規模而知先後緩急之序所謂規模者外禦強寇內銷盜賊修軍政變士風裕邦財寬民力改弊法

省冗官誠號令以感人心信賞罰以作士氣擇帥臣以任方面選監司郡守以奉行新政俟吾所以自治者政事已修然後可以議興舉而問罪金人迎還二聖此規模之大略也至於所當急而先者莫先於料理河北河東兩路夫河北東者國之屏蔽也料理稍全然後中原可保而東南可安今棄置兩路不復料理而欲自安於東南譬猶外有寇盜不為之藩籬而欲安於堂奧其可得乎今河北河東雖為金人蹂踐而殘破河東所失

者忻代太原澤潞汾晉其餘猶存也河北所失者不過  
真定懷衛濬四州而已皆靖康之末所為失之真定以  
新易李邈為帥懷以折彥質遞去衛以朝廷遣使交割  
濬以無城郭之故其餘中山河間慶源保塞雄霸深祁  
恩冀邢洺磁相信安廣信二十餘郡皆為朝廷守兩路  
士民兵將所以戴宋者其心甚堅在州郡者依城郭無  
城郭者依大河西山結山寨以為固皆推豪傑以為頭  
領多者數萬少者亦不下萬人如此知名字者已十數

處朝廷不因此時置司遣使有以大慰撫之分兵以援其危急臣恐為金人所迫糧盡力困坐受其敝強壯而狡猾者從賊其次者為盜老弱稚孺渡河而朝廷何以待之且金人善因兵於敵兩路軍民雖懷忠義之心使救援之兵久而不至危急無告必且憤怨朝廷使金人因得撫而用之皆精兵也彼復何待借兵於他國哉驅之以擾中原而將之以首首中國之兵亦將望風奔潰未易禦也臣愚以謂莫若於河北置招撫司河東置經

制司擇有材畧者為之使宣諭陛下德意所以不忍棄兩河於夷狄者措置經營結連其豪傑而用之救援危急收復州縣朝廷應副錢糧告敕有功者即命以官其能保全一州收復一郡隨其高下以為節度防禦團練使如唐方鎮之制使自為守非特絕其從賊之心又可資其力以禦敵朝廷久遠無北顧之憂此最今日之先務也僉議亦頗以為然上曰誰可任此者余奏曰陛下儻採用臣策臣當詢訪其人續且聞奏旣退詢於士大

夫間多謂張所可以招撫河北傅亮可以經制河東而余亦頗聞其為人張所者山東人以進士擢第有材氣謀畧當靖康間為監察御史朝廷以金人再犯闕欲割棄河北旣遣使矣敵騎薄城京師圍閑所在圍城中獨上言乞以蠟書募河北兵淵聖許之蠟書至河北士民皆喜曰朝廷欲棄我於夷狄猶有一張察院欲救我而用之乎應募者凡十七萬人故所之聲滿河北部勒旣定會都城破謀弗果用上即位於南都所首至行在見

上論列且條具應募首領姓名人數合措置事件以聞  
朝廷欲以為郎官奉使河北以董其事會所以察官上  
章論黃潛善及兄潛厚姦邪不可用恐害新政潛善引  
去上留之乃謫所鳳州團練副使江州安置是時余尚  
未至行在也故衆謂招撫河北司非所不可然余以所  
嘗論潛善之故頗難之時既迫他無可使者不得已一  
日過潛善閣子中相與欵語曰吾輩蒙上委任於艱難  
之秋實負天下之重責而四方士大夫號召未有來者

前日議置河北招撫司搜訪殊無人可以承當獨一張  
所可用又以狂妄有言得罪如所之罪孰不以為宜第  
今日事迫矣一失機會悔不可追不得已勢須試用  
之如用以為臺諫處要地則不可使之借官為招撫冒  
死立功以贖過似無嫌第未知於公意如何儻能先國  
事後私怨為古人之所難不亦美乎潛善欣然許諾乃  
薦之於上且道潛善意上說有旨借所通直郎直龍圖  
閣充河北招撫使是時所已赴謫所遣使臣齎劄子召

之二十餘日而後至上召對摹畫稱旨錫五品服內府  
賜緡錢百萬以備募兵半年錢糧給空名告千餘道以  
京畿兵千人為衛將佐官屬聽自辟置一切許以便宜  
從事有朝請郎王圭者真定府人真定旣破率衆數萬  
保西山屢勝金人聞上登極自山寨間道來其所謀正  
與朝廷同能道河北事尤詳有旨除直祕閣招撫司參  
謀官使佐所凡留行在者又二十餘日而後行傳亮者  
陝西人以邊功得官諳練兵事靖康初至京師上封事

請以親王為元帥治兵於河朔淵聖不喜令押出門其  
冬復有薦者再召之亮至而都城已破率陝右京西勤  
王兵三萬人首至城下屢立功統御將佐士卒如古人  
整齊畫一無敢犯令者上即位亮詣行在召對除通直  
郎直祕閣而亮之為人氣勁直議論不能屈折執政不  
喜之除知滑州滑兩經殘破無城壁亮上疏自陳曰陛  
下復歸東都則臣能守滑陛下未歸則臣亦不能守也  
執政摘其語以為悖傲不遜降通判河陽府亮憤懣而

去余至行在亮已行使人召之乃來與語連日觀其智  
畧氣節真可以為大將者欲且試之乃薦於上以為河  
東經制副使而以觀察使王瓊為使瓊亦陝西人累立  
邊功僉謂在武臣中可用者上宣諭亮前疏中語余廣  
上意而奏曰人臣論事言不激切不足以感動人主激  
切則近謗訕故昔之聽言者必察其所以如果出於謗  
訕何所逃罪至於有所激而云則必恕之以來讜言如  
周昌之對高祖劉毅之答武帝皆人之所難堪者而二

主怒之以其有所激故也亮之言如此但欲激陛下以歸京師耳非有他故願聖度有以含容之且人材難得而將帥之材為尤難如亮者今未見其比異日必能為朝廷立大功氣勁言直乃關陝氣俗之常不足深責上乃許如所請並召對賜瓊袍帶賜亮五品服與兵萬人告敕銀絹與川綱之在陝西者詔京西陝西漕臣應副糧草餘如張所已得旨而遣之初余旣建議以料理河北河東為所當先者適後宮降誕皇子率執政入賀余

奏上曰皇子降誕考祖宗故事當肆赦陛下登寶位赦  
已曠蕩獨遺河北河東而不及勤王之師天下尚觖望  
夫兩路為朝廷堅守而赦令不及人皆謂已棄之何以  
慰忠臣義士之心而勤王之師雖不曾用在道路半年  
擐甲荷戈冒犯霜雪亦已勞矣疾病死亡者不可勝數  
恩卹不及後日復有急難何以使人願因今赦該載德  
意上嘉納故皇子赦於二者尤詳又請降詔褒慰兩路  
守臣將佐軍民論以朝廷措置救援不棄之意守臣各

轉兩官進職餘具職位姓名以聞又詔自今有能收復  
兩路已陷州郡及救解危急保全一方功效顯著者並  
除本處節度觀察團練防禦使依方鎮法又詔兩路軍  
民自今不得撰造事端以疑慮擅殺官吏又命使臣齎  
夏藥徧賜兩河守臣將佐又命榷貨務印造見錢鈔遣  
使齎送兩路州郡又命降見錢鈔三百萬貫付河北東  
路陝西路漕司廣糴應副兩路又命起京東路夏稅絹  
於大名府椿管川綱河東衣絹於永興軍椿管以待兩

路支俵於是兩路知天子德意人情翕然蠟書日至間  
有破賊捷報敵人圍守諸郡者往往抽退而山寨應招  
撫經制司募者甚衆又擇武臣可用者置沿河巡察使  
自河陽抵濱滄凡六處各有地分以為斤堠而潛善建  
議令馬忠將所部兵會雄州弓箭手李成所募兵凡五  
萬人擣虛入界敵必釋諸郡之圍以自救余曰解雜亂  
紛糾者不控捲救鬪者不搏擊批亢擣虛形格勢禁則  
自為解此固古法但今日士怯兵弱恐未可以深入而

馬忠者在靖康初雖嘗宣力其後官崇志滿自愛惜不肯決戰屢敗衄恐不足以任此莫若使之與張所協力先復濬衛懷三州士氣既振乘勢鼓行而北則諸郡之圍必解而真定可復河北可以得無事矣事固有因時而制宜者此也是時金人留兵三州祇數千人餘皆驅據吾民剃剪用之張所遣間與之結連多願為內應者以官軍民兵相表裏而圖之功可指日而成故余之策出此而潛善堅執其議上可之余不欲力爭乃以忠為

河北經制使而以張換副之換者陝西人質樸有謀而善戰其材遠勝於忠既使副忠又令與張所相應援而換亦以余之策為然進呈諫官鄧肅論僞命臣寮劄子多已行遣而肅曾在圍城中知之尤為詳有未及者數人皆等第行遣如十友之類令留守詢訪姓名以聞其言頗及呂好問好問者申公夷簡曾孫以元祐黨籍久困州縣士大夫頗推其恬於仕進靖康初余薦於淵聖以為諫官其後為侍從邦昌僭逆以為執政而好問嘗

以蠟書至元帥府故上即位首擢為右丞肅論之頗怒而侍御史王賓亦上疏極言好問在圍城中方淵聖拘於敵營宜以蠟書至元帥府督進師而反勸進為懷二而挾姦無大臣節况嘗汚僞命不可以立新朝好問慙求去甚力乃除資政殿學士知宣州又進呈肅論耿南仲父子章疏上曰南仲誤淵聖罪天下共知朕嘗欲手劖擊之夫復何道乃以散官安置嶺南而其子延禧落龍圖閣學士令隨侍又進呈王賓論范訥趙野王襄總

師逗遛不進而縱其下暴掠甚於盜寇章疏有旨降官  
分司而賓論之不已乃皆以散官安置又論京西湖北  
為金人盜賊侵犯有能以死固守而保全一方者有賊  
未至而先遁遂失守者謂宜褒黜以明功罪如趙子崧  
之守陳趙子櫟之守汝閭孝忠之守蔡黃叔敖之守襄  
陽李彥卿之守漢陽鄂倅趙令裨之援黃州縣令陳規  
之守德安程千秋之守公安皆宜褒賞有旨轉兩官或  
與職名而以令裨知黃州規知德安千秋通判荆南如

陸德先之棄隨州鄧雍之棄荆南舒舜舉之棄郢州趙縱之之棄復州皆宜黜罰有旨降兩官落職有類此者言事官條具以聞又論折彥質為宣撫副使而逃亡入川峽錢蓋為陝西制置使而逃至湖北許高許亢防河而逃至江南儻不懲戒則後孰肯以死任責者有旨彥質散官安置高亢編管嶺南蓋落職降官分司命南康軍奏高亢寓其境欲謀變守倅以便宜誅之而待罪衆謂擅殺為非是余曰淵聖委高亢守河付以兵將甚衆

賊將至而先走以鐵騎五百自潁昌挈家趨江南沿路  
劫掠甚於盜賊朝廷不能正軍法而一軍壘守卒敢誅  
之必健吏也使後日受命捍賊者知退走而郡縣之吏  
有敢誅之者其亦少知戒乎是當賞上亦以余言為然  
乃命各轉一官是時范訥王襄罷而開封府與留守闕  
官余薦宗澤於上以為留守非澤不可澤浙東人自為  
小官即卓犖有氣節敢為不詭隨於世以故屢失官靖  
康間知磁州上以康邸持節使敵中時金人已再犯河

北澤力挽留以為不可行其後有元帥之命遂即大位澤之功為多同列忌之譖毀百端不得留府中既而除知襄陽府余到行在澤適至與語衆可聽發於忠義至慷慨流涕故余力薦之上笑曰澤在磁凡下令一切聽於崔府君余奏曰古人亦有用權術假於神以行其令者如田單是也澤之所為恐類於此京師根本之地新經擾攘人心未安非得人以鎮撫之不獨外寇為患亦有內變可虞使澤當職必有可觀上許之乃除延康

殿學士知開封府兼留守澤至京師果能彈壓撫循軍民畏愛修治城池樓櫓不勞而辦屢出師以挫敵鋒雖嫉之者深竟不能易其任也知北京徐處仁死余薦杜充代之而已劉錫代充守滄州又頗易置諸路帥臣監司及京東西守臣然常患帥材之難得也一日上批出遷汪伯彥知樞密院事而除張慤同知慤是時方自河北都轉運使除戶部尚書初至行在余因對奏上曰慤以曉財利勤幹稱以為戶部尚書乃其任也今纔供職

遽除執政不惟太峻未副人望兼戶部財計賴慤措置  
乞少緩之候慤措置財計稍就緒日除擢未為晚陛下  
用宰相臣不得而與至執政臣當聞敢以為請上乃止  
令遷伯彥而以黃潛善遷門下侍郎兼中書後二十餘  
日竟除慤蓋潛善主之也余因對復奏曰臣前欲少緩  
張慤除命非沮之正欲藉其力措置戶部事今陛下已  
擢用慤乞且以戶部事委之乃命慤兼總領戶部財用  
上又令以許景衡為中丞王賓除諫議大夫時景衡以

給事中召未至余奏曰陛下以景衡為中丞誠得其人  
然故事中丞無自外除者王賓遷則臺中無長官乞候  
景衡至行在日降處分上許之是時除侍從卿監郎官  
館職以補班列之闕及召赴行在者多未至而行在官  
出自圍城中者多求東南差遣以自便上命余草詔以  
戒諭之其後許翰至余薦之於上謂翰外柔內剛學行  
純美謀議明決宜在左右叅與大政上亦喜其論事乃  
以為尚書右丞然翰之來晚不能有所助也初汴河上

流為盜所決者數處決口有至百步者閉塞久不合乾涸月餘綱運不通兩京乏糧米價騰湧朝廷責降都水使者陳求道榮嶷皆為散官依舊領監事又命提舉京城所陳良弼同共措置凡二十餘日而水復舊綱運沓來乃令三分留一於行在每綱到即間撥入京師糧始足米價始平又擇使臣八員為沿汴巡檢每兩員將兵五百人自洛口管認地分至西水門分布防察乃免濫決之患又於兩京城外及沿汴至泗增置巡檢商賈始

通人情始漸復舊命進奏院邸吏分兩番赴行在增給食錢朝廷差除鏤板傳報外路增置馬遞鋪添給錢糧命令始通州郡命綱運入京者還載諸部公案圖籍赴行在官府始有稽考蓋行在草創凡百皆逐一施行措置悉類此也

梁谿集卷一百七十五

欽定四庫全書

梁谿集卷一百七十六

宋 李綱 撰

建炎進退志總叙

三

一日同執政奏事內殿余留身進呈三劄子一曰募兵二曰買馬三曰募民出財以助兵費余奏上曰國家以兵為重方熙豐盛時內外禁旅合九十五萬人至崇觀間而闕額不補者幾半西討夏人南平方寇北事幽燕所折閱者又三之一至靖康間金人再犯闕潰散逃亡

者又不知其幾何方建炎初天下勤王之師集於都城  
側者三十餘萬人其間多係召募民兵儻擇正兵之可  
用者留十餘萬分屯要害州郡運糧給之以為後圖亦  
足以壯聲勢而備緩急朝廷乃一切放散而京東河北  
之兵在元帥府者又皆援例以歸遂使行在禁旅單弱  
雖旋蒐裒其勢不多何以捍強敵而鎮四方今已散之  
兵既不可復追而東南之人其實輕剽不可使之遠戰  
耐勞苦習戰陣惟西北之人可使為今日之計莫若取

財於東南募兵於西北方河北之人為金人搔擾未有所歸之時而關陝京東西流為盜賊強壯不能還業者甚衆乘此遣使四路優給例物以招募之新其軍號勒以部伍得十數萬人付之將帥以時教閱訓練不年歲間皆成精兵於要害州郡別置營房屯戍使之更番入衛行在此最今日之急務也夫金人專以鐵騎取勝而中國馬政不修騎兵鮮少乃以步軍當其馳突宜乎潰散蓋祖宗朝養馬於監牧孳生蕃盛所在雲布故軍旅

之用足至崇觀間監牧廢而為給地牧馬有其名而無其實既無孳生馬益銷耗其後燕山陷沒馬之入於夷狄者不可勝數金人初犯闕河北京畿之馬為之一空其後破都城首下令括馬而京師之馬入於賊者萬有餘疋今行在騎兵既已不多又皆疲劣官馬既無獨陁西京東西諸路尚有私馬宜降指揮立格尺以善價買之可以濟一時之乏民間養馬必皆上戶及僧道命官之家中下戶自無馬可養取之既不厲民而旬月間馬

遂可集朝廷討論監牧之制脩復馬政命四川茶馬司  
益市馬效在年歲之外馬不患乎不足此今日不得已  
之務也國家新罹寇難京師帑藏悉為金人所取外路  
州郡以調發勤王之師財用為之一空今又募兵買馬  
招撫盜賊措置邊事應副殘破州縣振舉百度以圖中  
興非常賦之所能供辦又不可橫賦暴斂科取於民如  
免夫錢天下至今咨怨惟上二等物力有餘之家可行  
勸誘使斤其贏餘以佐國用而以官告度牒之類償之

使朝廷軍馬精強措置邊事就緒盜賊衰息彼乃得保其財產不然雖欲保家室不可得况財產哉宜命州縣委曲諭以德意必有樂輸從命者此又今日不得已之務也然募兵買馬勸民出財全藉州縣官吏體朝廷德意而奉行之其有抑勒科配致搔擾者重寘於法奉行有叙不擾而辦者量加旌賞令諸路監司保明按察以聞則三者可以指日而辦上皆以為然命以劄子付中書省條具取旨乃與黃潛善商議於陝西河北募兵各

三萬人於京東西募兵各二萬人合為十萬許召募白  
身於諸色廂軍中揀選招收潰散兵卒改刺創置軍號  
驍勝壯捷忠勇義成龍武虎威折衝果毅定難靜邊凡  
十軍每號四軍每軍二千五百人例物白身人全給依  
上禁軍法量增分數餘給半許用諸路闕額禁軍錢常  
平司錢不足即自朝廷應副每募及一軍就本路選差  
有材武大小使臣充將官部隊將押赴行在內京東西  
委兩路提刑司河北委招撫司陝西委經制司而以錢

蓋依舊為陝西經制使初蓋在靖康間嘗建議河外湟  
鄯之地於朝廷無毫髮利而歲費不貲為中國患不若  
求青唐之後而立之使撫有其舊部以為藩臣朝廷省  
費而新邊弓箭手皆可徙置河內以備使令有益麻党  
征者故王之子素為國人信服儻封立之必得其力至  
是用其策故遣蓋為使齋告賜益麻党征措置湟鄯事  
而因委之以募兵又議買馬分為三等格尺價直除命  
官將校見養馬不許括買外餘並籍記赴官揀選及格

尺中披帶者即時給還價直每及百疋差官一員管押  
赴行在隱寄妄冒有馬不籍及無馬而抑勒令置買者  
並科違制之罪委逐路提刑司總之又議募民出財宜  
降詔曉諭俾州縣勸誘有能出財助國者籍記姓名多  
寡申朝廷給降度牒償之入財多者取旨推恩應勸誘  
到錢物並別項椿管聽候朝廷指揮專充募兵買馬緣  
邊事支用敢科配搔擾者命官竄責吏人決配委監司  
按察凡募兵買馬勸民出財奉行有叙保明推賞中書

條具進呈有旨從之又議措置控禦脩舉軍政余謂唐之方鎮當時實賴其力以定患難第措置失宜而其後行姑息之政威柄浸移乃有尾大不掉之患祖宗革去其弊削弱州郡之權一切委以文吏非沿邊諸路雖藩府亦屯兵不多無敢越法行事以處太平無事之時可也一旦夷狄長驅盜賊蠭起州郡莫有能抗之者遂至於手足不足以捍頭目為今之計莫若稍倣方鎮之制擇人任之而假以權減上供錢穀使之養兵而訓練之

大小相維遠近相援庶幾可以救今日之患夫方鎮者  
節度使之兵也其次有觀察團練防禦今既以為階官  
不可復改宜於沿河沿淮沿江諸路置帥府要郡次要  
郡使帶總管鈐轄都監以寓方鎮之法許其便宜行事  
辟置寮屬將佐以治兵不數年間必有可觀昔馬燧之  
鎮太原也承鮑防之後兵力衰單燧募廝役悉補騎士  
教之戰數月成精卒居一年闢廣場羅兵三萬以肆威  
震北方李抱真之鎮澤潞也乘戰伐後賦重人困軍旅

彫利乃籍戶三丁擇一蠲其徭租給弓矢令閑月得曹偶習射歲終大校親按籍第能否賞責比三年皆為精兵舉所部得成卒二萬遂雄山東天下稱昭義步兵為諸軍冠此方鎮之效也要在得人以任之寬其銜勒以責成功而誅賞廢置之柄悉在朝廷使無不能運掉之患則今日控御之策宜無大於此者至於軍政當法古揆今而更張之古者自伍兩卒旅積而至於二千五百人而為師又積而至於萬二千五百人而為軍其將帥

正長皆素具故平居恩威足以相服行陣節制足以相使若身運臂而臂使指無不可者此所以能捍患禦敵而成功也國朝之制惟以五十人為一隊伍百人為一指揮而有故出師始命將佐取具臨時兵將初不相識而欲其臨患難而用命指呼如意蓋亦難矣今宜法古以五人為伍中擇一人為伍長五伍為甲別選一人為甲正四甲為隊有隊將正副二人五隊為部有部將正副二人五部為軍有正副統制官節制統制官有都統

節制都統有大帥皆平時選定閒居則閲習有故則出戰非特兵將有以相識而恩威足以相服驅之行陣益多益治此韓信多多益辦之術也夫用兵以賞罰為勸沮而自崇觀以來有功者賞踰期敗衄者罰不及用命死敵者以收身不到為名而無贈卹遇敵奔潰者以轉山迷道為辭而反招收賞罰如此豈復有軍政哉宜置賞功司凡士卒有功者即時推賞後有不實坐所保將帥而將之敗衄卒之逃潰者必誅臨陣死敵者寬主將

之罰使必以實告而優贈卹之庶幾士氣猶可作也且  
祖宗嚴禁軍逃亡之法而近年不復行也嚴犯階級之  
法而近年不復行也嚴離部伍之法而近年不復行也  
嚴夫主將之法而近年不復行也若此之類皆宜申明  
約束增重法制又納級討功之法有當議者如選鋒精  
騎陷陣却敵神臂弓強弩勁弓射賊於數百步外豈可  
責以斬首級哉若此之類宜命將帥保明全軍推賞余  
又具劄子於上前論之甚詳僉謂帥府要郡之制可行

但未可如方鎮割隸州郡措置軍政當先施行於御營司及招置新軍乃命京東東西路京西南北路河北東路永興軍路淮南江南兩浙東西路荆湖南北路皆置帥府要郡次要郡帥府為安撫使帶馬步軍都總管要郡帶兵馬鈐轄次要郡帶兵馬都監皆以武臣為之副改路分為副總管路鈐轄為副鈐轄州鈐轄為副都監總管鈐轄司許以便宜行軍馬事辟置寮屬依帥臣法屯兵聚糧皆有等差遇朝廷起兵則副總管為帥副鈐

轄都監各以兵從正官願行者聽轉運使一員隨軍一員留本路而提刑彈壓本路盜賊遇有盜賊則量敵多寡出兵會合以相應援本路帥臣當職官措置兵馬先就緒者當優議旌賞又命招置新軍及御營司兵並依新法團結五人為伍伍長以牌書同伍四人姓名二十五人為甲甲正以牌書伍長五人姓名百人為隊隊將以牌書甲正四人姓名五百人為部部將以牌書隊將正副十人姓名二千五百人為軍統制官以牌書部將

何以禦敵金人內犯所至官吏軍民多不能守而郡縣  
遂陷沒者非特士氣怯懦蓋禦敵之具不備使然宜詔  
諸路州縣以漸脩葺城池繕治器械朝廷量行應副有  
能葺治備具者當旌賞一二以勸之有旨依奏應州縣  
欲修城池者申朝廷給降祠部應副又奏金人專以突  
騎勝敵而中國騎少步多固宜多致潰敗夫步不足以  
勝騎而騎不足以勝車此必至之理故古人之戰多以  
兵車衛青所以能深入匈奴者以用武剛車自環而依

以為固也馬燧所以兵雄朔方者以制為戰車冒以狻  
猊象列戟於後行以載兵止以為陣遇險則制衝冒也  
後世徒見房琯嘗以車戰敗遂不復用殊不知制禦突  
騎非車不可顧所以用之如何耳但當以革冒之以備  
火攻故古之兵車謂之革車者所以防火也臣在靖康  
間駐軍河陽則車制簡易輕捷數人可推運行進退旋  
轉曲折皆如人意每車用卒二十五人行則為行陣止  
則為營壘平原可以馳逐險阻可以控扼士卒有所依

而鐵騎不得以奔衝其制甚精凡造數百兩教閱月餘士卒皆習熟會臣罷不果用今宜頒其制於京東西使製造而教閱之其詳具劄子中因繪圖進呈有旨令御營司製造閱習諸將皆以為可用乃頒降兩路委提刑司總領之又奏大河江淮皆天設之險帝王所恃以守其國者也然須措置控扼以人績加之乃為我用苟委之自然不復措置雖大河奔湍虜騎濟渡如枕蓆之上況江淮哉嘉祐中范仲淹請於河陽上流置戰艦水軍

習水戰以備契丹之深入當時不從其議至於靖康間  
金人渡河如入無人之境蓋無水軍戰艦以擊其渡而  
控扼之也昔曹操盛兵以臨江表周瑜以舟師破之赤  
壁而操終身不敢窺吳由是觀之使有水軍戰艦因其  
濟而擊之得一勝則敵人破膽矣且金人便於騎射而  
舟楫非所便以我所長攻彼所短其勝萬全但有其備  
使彼不敢輕濟為利已博況勝之哉為今日之計莫若  
於汾河汾江汾淮州郡置造戰艦因其俗之所宜招募

水軍凡習水而能操舟者皆籍記其姓名平居許其自便有故則糾集而用之逐時教閱量習激賞不年歲間皆為精兵則所以固吾圉者莫要於此其詳亦具劄子中有旨如所請招置水軍以樓船凌波為號又命御營司幹辦公事楊觀復齋空名告往江浙募人造船餘路委提刑司措置總領又奏上既於河北陝西京東西四路募兵而軍器衲襖旗幟之類經靖康之變類多散失內庫甲冑甚多特太重大兵卒不能勝乞降指揮條具

軍器衲裨闕數下諸路轉運司製造於行在置司取內庫甲改為大小三等之制及圖畫式樣刺造旗幟之屬上皆可之又詢訪陝西山東及諸路武臣材略可用者百餘人乞召審察以備將佐偏裨之用有旨皆召赴行在自六月初至是凡四十餘日措置邊防軍政之類始漸就緒是時朝廷議遣使金國余奏上曰堯舜之道孝悌而已孝悌之至可以通於神明今陛下以上皇淵聖遠狩沙漠食不甘味寢不安席思迎還兩宮致天下養

此孝悌之至而堯舜之用心也然今日之事正當枕戈  
嘗膽內脩政事外攘夷狄使刑政脩而中國強則二聖  
不俟迎請而自歸不然雖使冠蓋相望卑辭厚禮朝迎  
暮請恐亦無益今所遣使但當奉表通問兩宮致思慕  
之意可也上以為然命余草表并致書二酋長乃以周  
望傅雱皆借官為二聖通問使齋表及書以往又奏上  
曰陛下當艱難時為臣民之所欣戴纂承大統宜降哀  
痛之詔以感動天下忠臣義士之心具言祖宗功德涵

養海內之深金人不道屠戮生靈之酷社稷艱危之急  
二聖播遷之痛今日所以賴天下士民同心協力相與  
扶持保安以致中興者凡所告諭必盡誠意明白言之  
無有隱諱使讀而聞之者雖武夫悍卒知所激勵然後  
按其所言次第行之無為虛文務施實惠必能昭格天  
意感激人心轉危為安有不難也昔陸贊有言履非常  
之危不可以常道安解非常之紛不可以常理論又曰  
動人以言所感已淺言又不切人誰肯懷正今日之謂

上乃命余撰擬詔文進呈頒降又具劄子以謂艱難之際賦入狹而用度廣內自朝廷外至州縣監司宜省冗員以節浮費上命中書條具乃詔省臺寺監官以繁簡相兼復開封官舊制減學官員額罷提舉常平司併歸提刑司罷兩浙福建市舶司併歸轉運司復幕職曹官舊制非萬戶縣不置丞罷吏員三分之一又請以三省堂吏依祖宗法轉官不得過朝請大夫初陳乞出官止為通判應前宰執子弟以恩數帶貼職及侍御以上並

罷宰執及見任宮觀待闈未有差遣京朝官以上俸錢  
並減三分之一有旨從之是時四方潰兵為盜如祝靖  
薛廣黨忠閻瑾王在之徒皆招安赴行在凡十餘萬人  
余謂今日盜賊正當因其力而用之如光武用銅馬綠  
林下江之屬以定天下曹操亦用黃巾以破袁紹顧所  
以駕馭之者如何耳不移徙其部曲則易以叛去移徙  
之則彼必致疑正當以術制之使由而不知則可乃以  
此意奏上命御營司差官每招安到一頭項即先號令

有元係良民願歸業及有營房兵卒願歸營者給券及公據遣之遣去太半又擇其羸弱不勝兵者放散獨留強壯願充行陣立功者以新法團結每一軍差大小使臣充部隊將及擇有材略者為統制官以統之而其頭領皆命以官於他統副下充准備將領及差遣之類於是無叛去者獨淮南劇賊杜用山東李昱丁順楊進皆擁衆數萬不可招而拱州之黎驛單州之魚臺皆有潰兵數千人作過余奏上曰方今朝廷外有大敵而盜賊

乘間竊發擾吾郡縣其勢不先靜內寇則無以禦外侮盜賊雖主於招安然不震耀威武使知所懼則彼無所忌憚勢難速平宜分遣兵將討殄數處則餘者自服上以為然乃命御營都統制王淵率師討杜用都巡檢劉光世討拱州叛兵統制官喬仲福討李昱韓世忠討魚臺賊不旬月間皆破之斬杜用李昱獲甲馬寶貨不貲餘悉平殄丁順楊進乃就招撫司招安過河惟李孝忠者破襄陽擾京西湖北余建議遣范瓊討之范瓊者在

靖康間為統制官將兵河東頗宣力其後歸京師權步  
軍指揮使京城破淵聖幸敵營留不遣有閭門宣贊舍  
人吳革者私結禁衛欲劫金營迎淵聖歸謀洩為瓊及  
殿前都虞候左言誅之上即位瓊不自安朝廷以其握  
兵為降詔言節義所以責士大夫至於武臣卒伍當閹  
略之以責後效瓊尚反側至是余奏遣之討賊使離都  
城瓊以朝廷委用之心乃安卒殺孝忠招安其餘黨以  
赴行在一日與執政奏事內殿上出絹背心一宣諭曰

道君自燕山密遣使臣齋來領中有親書八字曰便可  
即真來救父母余與執政皆泣涕奏曰此乃陛下受命  
於道君者宜藏之宗廟以示後世道君遠幸沙漠所望  
於陛下者如此臣等敢不竭盡駕鈍措置邊事以副陛  
下聖孝恩慕之意執政退余留身論及靖康間事上曰  
淵聖勤於政事省覽章奏有至終夜不寢而卒有播遷  
之禍何也余奏曰淵聖在東宮十餘年令德聞於天下  
及即大位憂勤恭儉雖古之賢主無以遠過適當國步

艱難之時勤儉有餘而英明不足不能分別忠邪羣言紛至為小人之所惑故卒誤大事人主之職但能知人而任之近君子而遠小人雖不親細務大功可成不然雖衡石程書衛士傳餐亦無益也上以為然余因論靖康之初金人犯闕中國所以應之者得策凡二道君內禪一也淵聖固守二也使其後更得一策中國可以無事而和與戰兩者皆失之遂致大故而夷狄之患至今為梗方金人初犯闕提兵不過六萬人旣薄城下累日

攻擊知都城堅而士卒奮勵不可攻則遣使厚有所邀求而請和臣獻策淵聖以謂金人之所邀求有可許有不可許者宜遣使者往來欵曲與之商議俟吾勤王之師旣集然後與之約其可與者堅執勿與則約易成而和可久當時不以為然一切許之其後果不能如約遂再入寇此失其所以和也勤王之師集於都城四面者三十餘萬臣獻策淵聖以謂兵家忌分宜使節制歸一用周亞夫困七國之策以重兵與之相臨而分兵收復

畿邑使無所得糧俟其困而擊之一舉可破當時不以為然置宣撫司盡以勤王之兵屬之故姚平仲得先期舉事而朝廷懲劫寨小衄不復議兵賊退又不肯邀擊遂使金人有輕中國之心而中國之勢日弱此失其所以戰也夫機會之來間不容髮一失機會悔不可追譬如醫者治病證候既明而不投藥遂有至於不可料理者矣今日機會尤不可失願陛下以靖康為鑑審處而決斷以應之庶幾可以成功上曰靖康之初能守而金

人再來遂不能守何也余奏曰靖康之初與靖康之末其勢不同條目甚多臣請論其大者金人初入寇未知中國虛實亦無必犯京闕之意時中國失備無兵以禦之故使得渡河以至城下而粘罕之兵亦失期不至及其再來兩路並進遂有吞噬中原之意此其不同者一也靖康之初敵至城下不數日間勤王之兵已集及其再來賊已圍城始以蠟書募天下兵遂不及事此其不同者二也靖康初敵寨于西北隅而行營司出兵屯于

城外要害之地四方音問絡繹不絕勤王之兵既集敵  
遂斂兵不敢復出其後再來朝廷自決水以渰浸京城  
西北瀰漫數十里而東南不屯一兵使賊反得以據之  
故城中音問不傳於外而外兵亦不得以進此其不同  
者三也淵聖即位之初將士奮勵用命其後賞刑失當  
人心稍解體此其不同者四也金人圍城之初城中措  
置有叙號令嚴肅晝夜撫循未嘗少休聞其後無任其  
責者敵至造橋渡壕恬不加恤以十數人登城將士遂

潰此其不同者五也臣在樞密院時措置起天下防秋之兵降詔書已累月及臣宣撫河北即詔減罷太半蓋朝廷專恃和議以謂金人必不再來一切不為之備故靖康之末不能守者勢不同而患禍生於所忽也翌日奏事因裒聚靖康初建議措置與金人約和用兵次第劄子及朝廷分置宣撫司指揮後在宣撫司論不當減罷防秋兵章疏進呈上皆命留中因宣諭曰宣撫司官屬靖康間追逐非辜可並與差遣乃條具進有旨曾任

郎官監司人與知州軍差遣曾任館職以上人與通判  
差遣餘並非一等選人與優便占射余因奏上曰靖康  
間雖號為通言路然臺諫官如李光陳公輔余應求議  
論梗峭皆遠貶其實塞之也乃納劄子勸上以明恕盡  
人言以恭儉足國用以英果斷大事上皆嘉納與執政  
同進呈臣寮論宋齊愈事初齊愈為右司員外郎自圍  
城中出詣行在自陳以病在告不與偽楚事除諫議大  
夫至是臣寮論其首建議請立張邦昌按據甚明上以

其欺罔且首建偽楚之議震怒命付御史臺鞫治證驗  
明白齊愈款服衆頗為之救解上曰齊愈姦惡悖逆如  
此豈可不正典刑使邦昌之事成置朕何地衆乃不敢  
言有旨依法定斷仍榜其罪於通衢又進呈御史臺鞫  
治陳沖余大均洪芻王及之等公事皆在圍城中誘置  
內人為妾及因抄劄金銀自盜入己上曰此何等時乃  
敢如此初四人者罪不測衆救解之有旨情重者長流  
海島餘編置嶺南又進呈留守司鞫治承華夫人李氏

公事初張邦昌退歸府第出禁中李氏送之有語指斥乘輿上聞之命留守司同御藥院於內東門推治李氏欵服且言邦昌居福寧殿李氏嘗以養女陳氏侍邦昌寢其後邦昌之姊入禁中乃留其親隨人而易以陳氏歸府第上震怒謂邦昌敢居宮禁寢殿姦私宮人可以見其情狀余奏曰邦昌旣敢僭竊位號此乃細故耳然上竟以此深罪邦昌有旨李氏決脊降配軍營務下名為妻又宣諭王時雍逼迫道君出郊之狀余奏曰人臣

不能伏節死義而不顧君父一至於此雖犬彘有所不  
若天下所同憤嫉姑俟邊事就緒徐議再行遣未為晚  
也因納劄子乞減上供之數以寬州縣脩茶鹽之法以  
通商賈剗東南官田募民給地倣弓箭刀弩手法養兵  
于農籍陝西保甲京東西弓箭社免支移折變而官教  
閱之又請於陝西河北東路京東西置制置使使以遠  
近相應援有旨皆付中書省條具進呈取旨其後遂置  
諸路制置使而餘事以余罷政皆不果行



梁谿集卷一百七十六

欽定四庫全書

集部

梁谿集卷一百七十七

詳校官庶吉士臣張溥

侍讀臣孫球覆勘

總校官知縣臣楊懋珩

校對官中書臣潘奕鴻

謄錄監生臣牟焜

欽定四庫全書

梁谿集卷一百七十七

宋 李綱 撰

建炎進退志總叙

四

初余嘗從容奏上曰朝廷外則經營措置河北河東兩路以為藩籬葺治軍馬討平盜賊內則脩政事明賞刑皆漸就緒獨車駕巡幸所詣未有定所中外人心未安夫中原者天下形勢根本也一去中原則人心搖而形勢傾矣臣嘗建巡幸之策以關中為上襄陽次之建康

為下今縱未能行上策猶當適襄鄧示不去中原以係  
天下之心選任將帥屯列軍馬控扼要害以折金人之  
謀使今冬無虞車駕還闕天下之勢遂定而近日外議  
紛紜皆謂陛下且幸東南果如所言臣恐中原非復我  
有車駕還闕無期而天下之勢遂傾難復振矣上曰但  
欲迎奉元祐太后及津遣六宮往東南耳朕當與卿等  
獨留中原訓練將士益聚兵馬雖都城可守雖金人可  
戰余再拜贊上曰陛下英斷如此雖漢之高祖光武唐

之太宗不是過也因言履艱難之運者不宜懷安高祖  
光武太宗皆身將兵被甲冒矢石於馬上得之今固  
不待如此但車駕不去中原則將士思奮人百其勇盜  
賊不敢覬覦兩河易為經略雖少勞苦而後享安逸儻  
媿取一時目前之安如後患何中外未知陛下聖意乞  
降詔以告諭之上乃命余擬撰詔文頒降榜之兩京讀  
者皆感泣因措置迎奉隆祐太后津遣六宮以徽猷閣  
待制孟忠厚為提舉一行事務步軍指揮使郭仲荀統

兵扈衛餘令有司排辦後年月上忽降手詔欲巡幸東南以避狄令三省樞密院條具合行事件以聞余留之因具劄子極論不可且言自古中興之主起於西北則足以據中原而有東南漢光武唐肅宗是也起於東南則不足以復中原而有西北晉元帝是也蓋天下之精兵健馬皆出於西北而中興之主撥亂定功以兵馬為先一失西北則二者無自得之形格勢禁非特失地利而已今翠華儻或南幸委中原而棄之豈惟金人將乘

間以擾吾關輔盜賊且將蠭起跨州連邑朝廷號令不行精兵健馬反以遺賊道路梗塞人心驚潰陛下雖欲還闕有不可得況治兵勝敵以歸二聖哉惟南陽光武之所以興有高山峻嶺可事控扼有寬城平野可屯重兵西通關中可召將士南通荆湖巴蜀可取貨財東達江淮可運糧餉北距三都可遣救援輒議駐蹕自冬徂春兩河措畫就緒即還汴都策無出於此者上乃收還所巡幸東南手詔令與執政商議翌日再具劄子援楚

漢榮陽成皋間曹操袁紹官渡事論天下形勢甚詳又與執政議於上前余曰今乘舟順流而適東南固甚安便但一去中原勢難復還夫中原安則東南安失中原則東南豈能必其無事一失機會形勢削弱將士之心離散變故不測且有後艱欲保一隅恐亦未易臣誠不敢任此責且陛下旣已降詔獨留中原人心悅服奈何詔墨未乾失大信於天下願斷自淵衷以定大計上乃許幸南陽令措置合行事件有旨以觀文殿學士范致

虛知鄧州委以修治城池繕葺宮室官府朝廷降鹽鈔  
錢帛委轉運使范之才等儲峙糧草命發運司撥江湖  
綱運由襄江通漕命四川變轉輕貨陸路自陝西江路  
自歸峽以入南陽以黃潛厚為提舉一行事務以郎官  
陳袞李傳幹辦頓遞以發運使李祐為隨行轉運使將  
以秋末冬初擇日啓行而潛善伯彥陰以巡幸東南之  
說動上意其意頗傳於外客或謂余曰士論洶洶咸謂  
密有建議者東幸已決南陽聊復爾耳盍且從其議乎

不然事將變余曰天下大計在此一舉國之安危存亡  
於是乎分成命已行儻或改易吾當以去就爭之且上  
英睿必不為異議所惑不然吾可貪冒寵祿為保身計  
虛受天下之貴哉然自是雖未嘗有改議巡幸之命而  
上每批出改易已行指揮如批出買馬祇令每州買百  
疋余奏上曰元降買馬指揮不立額數祇令有馬及格  
尺者依等第給價買之今若每州限以百疋即無馬去  
處必須科配却成搔擾乃止又批出募兵改刺新軍有

害軍政余奏上曰元降募兵指揮許改刺者祇謂潰散  
兵卒無營房可歸者即非以見在營房兵卒許之改刺  
因以中書元批旨進呈上意乃悟又批出李擢已經淵  
聖責降宮觀今又責之為太重余奏上曰李擢在圍城  
中淵聖委令提舉京城南壁寶守陳州門一帶金人造  
橋渡壕擢恬不省察故責降宮觀其後竟自所造橋渡  
兵破城擢之罪大矣特城破之後淵聖不暇再行遣耳  
今以散官安置已為輕典儻猶以為重何以戒失守使

後來者任責潛善左右之甚力上乃令降作分司又批出翁彥國吳昉搔擾東南並落職與宮觀令學士院降詔慰撫初余未至行在彥國已除知江寧府委令修城及繕治官室朝廷給鹽鈔十萬貫彥國具劄子以為不足用余奏上曰崇觀間賜臣寮一第動費百萬令委彥國以脩城又新經兵火之餘令治官室祇給錢十萬貫誠為太寡有旨撥兩浙淮南鹽錢四十萬貫付之為五十萬且降指揮令其因陋就簡不事華壯上一日忽宣

諭彥國脩城等搔擾余奏上曰創脩宮室一新城池鳩工聚材計置墮灰工料浩大集事之初其勢不得無擾莫若明降指揮令其掇移諸州神霄宮及常平司廨宇一切拆舊脩蓋城壁亦因舊增葺使彼有所執守則費用省而搔擾之患自息乃命尚書省劄下旣而復批出責降且命降詔蓋潛善以彥國於余為姻家故密啓之以為譖惾之端也旣得上批札適同日得江寧府奏狀彥國已死又吳昉無職名可落僉謂宮觀太優將上取

旨上曰彥國已死不須行遣乃令放罷吳昉委提刑司  
取勘仍降詔慰撫東南如此之類批出者頗多初余每  
因留身奏事從容論治體及有所規諫雖苦言逆耳上  
皆嘉納至是奏陳當世急務擬進指揮多不降出余固  
知諧憇之言其入已深一日對內殿留身奏上曰臣以  
非材誤蒙聖慈使待罪宰相當國家艱難之時付以天  
下之重臣夙夜黽勉雖久患痘疾亦不敢在假將理思  
竭鴛鈍以報稱知遇之萬一近日屢煩宸翰令改正已

行事件臣逐一按據辯明幸蒙聖察又所進擬措置機  
務多未蒙降出顧臣孤拙寡與獨荷陛下特達之知忌  
冒者多恐必陰有譖愬而離間臣者書言時則勿有間  
之而管仲亦以信用君子而必以小人參之為害霸夫  
君子小人若冰炭然勢不兩立治亂安危係其進退在  
人主有以察之而已因出劄子極論君子小人之理且  
言靖康間淵聖聽用唐恪而恪姦邪舞智以御其君能  
得淵聖之心移易是非變亂白黑卒譖罷徐處仁吳敏

而奪之相其後遂致禍故方陛下精勵圖治枕戈嘗膽振起中興之功誠不願蹈覆車之轍也夫疑則當勿任任則當勿疑持狐疑之心者來讒賊之口願致察於此上慰諭曰無此但朕思慮偶及之耳其餘章疏見省覽非晚降出余拜謝而退至八月五日告廷遷余銀青光祿大夫尚書左僕射兼門下侍郎加食邑實封而除潛善右僕射兼中書侍郎旣命兩相則潛善顯沮張所而罷傅亮余以去就爭之遂定進退雖知墮潛善策中蓋

勢不得不然也初張所旣受招撫使之命建言乞置司  
北京候措置就緒即渡河移司恩冀以所募兵內納陷  
敵兵民復懷衛濬三州解邢洺磁相中山之圍以圖收  
復真定旣有期矣所尚留京師招集將佐措置錢糧而  
河北轉運使權北京留守張益謙奏招撫司搔擾不當  
置司北京且言所欲起北京屯戍兵給用器甲為非是  
緣置招撫司河北盜賊白晝殺人不若罷之專以其事  
委帥臣蓋張慤久為河北都運與益謙善慤以余嘗沮

其執政故附潛善伯彥相與謀使益謙為此奏以沮張所而惑上意也余奏上曰張所畫一乞置司北京候措置就緒日渡河令所尚留京師以招集將佐故未行不知益謙何以知其搔擾而言不當置司至於守兵器甲不可輒那當令招撫司具合用數申陳自朝廷給降可也朝廷以金人攻圍河北民無所歸聚為盜賊故置司招撫因其力而用之以解河北之急豈緣置司乃有盜賊令京東京西羣盜嘯聚攻掠州縣豈亦招撫司所致

耶方時艱危朝廷欲有所經略益謙小臣乃敢非理公  
然沮抑此必有使之者不懲之無以戒妄議而沮姦臣  
上乃令降旨招撫司依畫一置司北京就緒日疾速渡  
河不得抽摘守兵具合用器甲申朝廷應副如招撫到  
河北兵民嚴行鉗束無令作過張益謙令分析以聞尚  
書省旣劄下矣樞密院復以益謙申狀將上取旨凡千  
餘言痛詆招撫司令北京行下州縣出榜後數日乃關  
過尚書省余始見之乃以樞密院畫旨并尚書省元降

指揮同將上進呈與伯彥慤爭於上前余奏曰張益謙所奏皆細故情涉觀望尚書省已得旨行下而樞密院又別取旨痛詆訾之此何理也不過欲與益謙相表裏以細故而害大計沮抑張所耳朝廷以兵力不足而河北之事急故委張所以招撫因兵民盜賊之力以捍強敵而復故地今措置甫就緒行且成功而沮抑之如此州縣將士知朝廷議論不同安肯協力棄事功於垂成良可惜也臣不知朝廷之於張所欲其成邪欲其敗邪

欲其成則不當沮抑之如此欲其敗則不若罷去之無  
事挾私害公而不為國家慮也沮抑一張所有何所難  
致誤國家之大計使河北兵民盡為金人之所用河北  
州縣盡為金人之所有中原且弗能保將誰任其責靖  
康間惟朝廷議論不同無以公滅私之意遂及禍故令  
豈可復蹈覆車之轍耶伯彥慙無以對第云初不知尚  
書省已降指揮上乃令樞密院改正依前降指揮施行  
既不得逞即又為傅亮之事初王瓊傅亮既受命為經

制使副即具畫一申朝廷以謂河東州縣多為金人所陷沒至與陝西接連如河中府解州亦為所據與陝府相對以河為界今經制司所得兵纔及萬人皆烏合之衆其間多招安盜賊及潰散之兵未經訓練拊循難以取勝乞於陝府置司訓練措置召募陝西正兵弓箭手之在民間不出者及將家子弟不旬月間可得二萬人

陝西正兵及弓箭手皆精兵以童貫總兵賞罰不明皆藏於民間不出每應點集者皆其家人也故璣亮欲厚資給以募之皆可以當百也與正兵相為表裏其勝可必且一面結

連河東山寨豪傑度州縣可復即復之可以渡河即乘  
機進討以收復河陽河中解州沿河一帶據險以扼其  
衝漸議深入以復澤潞太原願當方面之寄有旨從之  
撥川綱之在陝西者使招募西兵又命陝西京西轉運  
司悉力應副瓊亮行纔十餘日樞密院復取旨令留守  
宗澤節制即日過河亮申朝廷以與前議及元降指揮  
不同今欲令過河無不可者但河外皆金人界分本司  
措置全未就緒旣過河後何地可為家計何處可以得

糧烏合之衆使復為金人之所潰散何自可以得兵亮  
等不足惜第恐有誤國事余將上進呈奏曰河東今日  
之勢不同河北所失不過數郡其餘皆為朝廷守王師  
渡河猶有駐泊得糧之處河東州縣太半陷沒沿河一  
帶自解州河中至河陽懷衛皆為金人所據今經制司  
軍旅未集遽違前議鼓之渡河遂為孤軍儻為金人所  
覆不知朝廷何所更得將佐士卒當此一道而經略之  
古者將帥不從中御願且如前議盡將帥之智慮而責

成俟其淹曠時月而無功則朝廷自有法以待之何必  
敵之若是之遽而潛善伯彥皆謂不使之亟渡河且失  
機會如亮等但欲逗遛耳余曰兵事不可遙度目下亦  
未見有機會可乘但當委任將帥使擇利而動耳今不  
恤其措置未辦集而敵之使渡河正所以為賊餌不見  
其利也且亮等受命而行纔十餘日申明朝廷前後所  
降指揮不同乃將帥之職豈可便以為逗遛如趙充國  
堅執屯田之議不聞宣帝以為罪也臣以謂不若只依

前降指揮為便上以潛善伯彥執議聖意頗惑依違不  
決者累日余留身極論其理且言潛善伯彥始極力以  
沮張所賴聖鑒察之不得行其志又極力以沮傅亮蓋  
招撫河北經制河東皆臣所建明而張所傅亮又臣所  
薦用力沮二人乃所以沮臣使不安其職臣每鑒靖康  
大臣不和之失凡事未嘗不與潛善伯彥商議而後行  
不謂二人乃設心如此如傅亮事理明白願陛下虛心  
以觀之則情狀自見上曰俟批出只令依元降指揮於

陝府置司至翌日批出乃云傅亮兵少不可渡河可罷  
經制司赴行在蓋潛善留身密啓之也余留御批將上  
奏曰臣昨日論傅亮事已蒙宣諭俟批出依元降指揮  
繼奉御批乃罷亮經制使不知聖意所謂上曰亮旣以  
兵少不可渡河不如且已余奏曰臣論傅亮乞降指揮  
非謂不使之渡河緣亮昨乞於陝府置司與金人對壘  
募兵訓練擇利過河收復州縣朝廷已從其請令行未  
半月遽改命使宗澤節制即令過河臣謂有不可者三

事從中御不盡將帥之慮一也軍旅未集驅烏合之衆渡河即成孤軍必為金人之所潰二也軍潰之後朝廷未有將佐士卒可以當河東一道之寄三也故臣以改命為非是當依前降指揮以責成功今乃緣臣爭論之故併與經制司罷之此必潛善等以私害公陰有以熒惑聖聽欲以沮臣使去耳臣荷陛下特達之知起自罪謫付以國柄方艱難之秋但知一意以為國家苟可以持危扶顛者知無不為庶幾仰副委任之萬一如以傅

亮經制河東乃今日所當為之大者潛善等乃欲以非  
理沮罷之此而可沮則其他孰可為者今御批猶未施  
行願陛下致察於此尚容臣得待罪宰司以圖報稱不  
然臣豈敢尸祿貪冒寵榮以虛負天下之責哉上曰如  
傅亮人材今豈難得余奏曰臣嘗欵與亮語觀其謀略  
智勇真可以為大將詢之士大夫亦以為然今以為經  
制副使姑試之耳假以時月必有可觀使亮如其所請  
臨敵退撓而無成功臣願受誤國之罪今未嘗用而遂

罷之則不可古之御將帥者恐不如此昔高祖何嘗自知韓信但以蕭何薦之遂為大將設壇場擇日而拜之何之所以知信者亦以屢與之語而已使高祖不能用何之言而將韓信則何亦必不敢當相位今人材難得而將帥之材尤為難偶得一二而朝廷所以輟那人兵應副錢糧器甲者種種辦具非涉旬月不能遣而啓行未幾遂以寸紙罷之待將帥之輕如此孰不解體此臣所以深為陛下惜也且潛善等所以必欲罷亮者意不

在亮乃以沮臣陛下不察則臣亦何敢安職恐終無以  
助陛下致中興之功上無語余以御批納上前曰聖意  
必欲罷傅亮乞以御批降付潛善施行臣得乞骸骨歸  
田里臣非敢輕為去就更望陛下留神熟思之使亮不  
罷則臣何敢決去因再拜榻前上猶慰諭謂不須如此  
余旣退聞亮竟罷乃入表劄求去上遣御藥宣押赴都  
堂治事余到堂復上馬歸再入第二表劄皆批答不允  
翌日遣御藥宣押赴後殿起居隨宰執奏事訖余留身

上曰卿所爭事小何須便為去就余奏曰人主之職在論一相宰相之職在薦人材方今人材以將帥為急恐不可謂之小事儻以為小臣以去就爭之而天意必不可回臣亦安敢不必去因再拜榻前復奏曰臣以愚惄仰荷眷知初無左右先容之助龍飛之初首命為相潛善伯彥自以謂有攀附之功方虛位以召臣蓋已切齒及臣至而議論偽楚建請料理河北河東兩路車駕巡幸宜留中原皆與之不同而獨蒙陛下嘉納聽從固宜

為其媚嫉無所不至方潛善未相所以譖讐指摘臣者  
不過欲為相而已今旣已相而猶沮抑不已以是為非  
變白為黑此不過欲臣去耳臣立於群枉之中獨賴陛  
下察之得以盡其區區之愚如傅亮之事曉然無可疑  
者又不蒙聖察是臣薦進人材不足用議論國事不足  
採其失職大矣豈敢復任宰相哉臣請以世俗之事譬  
之今有疾病者衆醫不能治而求之於草澤旣至而為  
之察色診脈曰病如此宜服某藥則愈而左右衆醫沮

之使不得投藥石則草澤之醫亦將辭退豈敢任責又如大廈之將傾而命都料匠以脩之必聽其擇材以易棟楹設木以事撐拄持危扶顛乃可復全而衆工沮之主人者不察旣不使之得以易棟楹又撐拄之具悉拔棄之則都料匠亦將告去何則覆壓之虞難任責也方朝廷承平無事之時宰相猶可尸祿備員以冒寵榮今艱難多故之秋當惜分陰人主以其相為不足任則當亟罷人臣自度不能勝其任則當亟去之臣自度終無

以當陛下之委任而負天下之責望敢久居此以妨賢  
路哉且臣嘗建議車駕巡幸不可以去中原潛善等必  
以此動搖聖意故力沮張所傅亮而去臣臣東南人豈  
不願奉陛下順流東下為安便哉車駕巡幸實天下人  
心之所繫中國形勢之所在一去中原則後患有不可  
勝言者故不敢雷同衆說以誤大事願陛下以宗社為  
心以生靈為意以二聖未還為念留神於此勿以臣去  
而其議遂改也臣仰荷天地之德雖去左右豈敢一日

忘陛下不勝犬馬依戀激切之至因泣辭而退遂上第  
三表劄客或謂余曰公決於進退之義得矣顧讒者不  
止將有患禍不測奈何余曰大臣以道事君不可則止  
吾知盡事君之道不可則全吾進退之節而已患禍非  
所恤也畏患禍而去彼獨不能諷言者詆訾而逐之  
哉天下自有公議此不足慮翌日降麻告建除觀文殿  
大學士提舉杭州洞霄宮加食邑實封時八月十八日  
也麻制中乃以余募兵買馬勸民出財為罪又謂行遣

僞命臣寮為報私怨納御批除目為慢君命不責翁彥  
國為黨庇姻戚爭議傅亮渡河為沮格王師如此類十  
數事皆潛善密以付詞臣余具表劄辭免不敢當觀文  
殿大學士降詔不允是時尚未受左僕射之命有旨令  
閣門併賜兩告不得已拜受陳謝即行以九月半抵鎮  
江府聞辛道宗之兵變於秀州宿留不敢行者半月繼  
聞其掠毗陵焚丹陽遂以客舟由外江歸梁谿而言者  
再論麻制中所指以為罪者又言余傾家貲以犒叛卒

為緋巾數千頂與之遣弟迓賊陰與之通朝廷不復究  
其實有旨落職令郢州居住謠謗如此自非上恩保  
全有以照見其無他雖欲處江湖之善地豈可得也聞  
命即由江東西以抵武昌適江上盜賊紛擾權寓居于  
屬邑之崇陽僧舍中暇日閱建炎初備位宰司日記追  
思以迂拙甚陋之資荷上知遇付以國事當軸秉鈞纔  
七十有五日竟以讒罷曾無涓埃之補而罪釁之積有  
踰丘山尚竊廩祿飽食而逸居慙歎深矣然余旣罷之

後張所亦以罪去傅亮辭以母病不赴行在而歸陝西  
招撫經制司皆廢車駕遂東巡而兩河郡縣皆陷於賊  
金人以次年春擾京東西深入關輔殘破尤甚此豈人  
力也哉因取進退之大槩次第而總叙之與夫制誥詔  
命書疏表劄編纂附著合為十卷目之曰建炎進退志  
庶幾覽者有所考焉至於臣寮之所建明四方之所陳  
請陟降人材改革政事自有史官書之此不復錄建炎  
二年十月二十日具位李某叙

梁谿集卷一百七十七